

438  
I  
Typis J. QUILLAU, Universitatis & Facultatis Medicinæ Typographi.

42

DEO OPTIMO MAX.  
UNI ET TRINO.

VIRGINI DEIPARÆ, ET S. LUCÆ  
Orthodoxorum Medicorum Patrono.

QUÆSTIO MEDICA,

CARDINALITIIS DISPUTATIONIBUS

manè discutienda in Scholis Medicorum, die Lunæ  
decimâ nonâ Martii 1725.

M. JOANNE GELLY, Doctore Medico,  
Præside,

*An cibus multiplex simplici salubrior?*

I.

**H**OMINIS vita calamitatum series, congeries, nondùm factus, vix inchoatus paritur dissipationem. Ad optatum majoris perfectionis gradum, imperfectionis minoris potius dicendum, nunquam perveniret, nec eodem semel adepto diù frueretur, nisi succo quodam, tenui quidem, sed sub viscido, dulci, temperato, &c. nutritium vocant, ipsius corporis fabrica promoveretur, abolveretur utcumque, & perennis, quam ferre cogitur jactura, perpetuò refarciretur. Illum verò succum suppeditant cibus & potus, utilem, si legitimus eorum usus; noxium, si improbus: hinc morborum Illas; ipsa mors; illinc optabilis sanitas; vita diuturna. Mirum in re tanti momenti tot committi peccata, incontinentiâ potissimum, inscitâ, præjudicio. Ut ciborum diversitas major, sic in his quam in potibus, per inscitiam saltem aut præjudicium culpa frequentior. Multi authores, etiam melioris notæ, cibum simplicem multiplici longè putant anteponendum: sunt è contra, & qui.

dem diligentes œconomix animalis exploratores, qui, cæteris paribus, non leviozem dictæ errorem in conquistâ ciborum simplicitate positum asseverant. Quæris anxius, in tantâ super hâc re magistrorum controversiâ, quæ sit sententia potior, quis usus servandus? sit ne cibus multiplex? sit ne salubrior simplex? en accipe: Vide cujus est concoctio felicior, facilior distributio; nodus difficultatis erit tibi planè solutus id si diligenter observaveris sedulus veritatis & sanitatis indagator.

## I I.

**S**ANITAS in functionum integritate posita est. Quod illam præsentem servare potest, revocare absentem, fugientem retinere, eamve juvare redeuntem, id tibi salubre vocandum. Corporis sanitati conferunt esculenta nutritione, accretione: hæc deficientium particularum additione; illa deperditarum restitutione; utraque nutritiorum, quas complectitur cibus molecularum intus susceptione perficiantur. Optatus ille ciborum terminus longè ab his distans est; viæ angustæ, reflexæ, tortuosæ, difficultatis plenæ. Sua sunt cibus ipsis ad nutriendum impedimenta; corpora namque sunt, plus minus solida, ac proindè partium suarum subactioni, divisioni, attritioni, verbo dicam, concoctioni resistentia. Quanta tamen sit necessitas coctionis, quanta simul ejusdem difficultas, ex multiplici organorum & instrumentorum huic operi addictorum numero, apparatu mirabili & stupendâ potentiâ conjiciendum. Nec mirum; à nutritione namque pender sanitas, à distributione nutritio, à coctione distributio.

## I I I.

**C**ORPORIS nostri machina duplici partium genere constat; solidarum, liquidarum. Sese mutuò movent illæ partes, & moventur indefinenter: solidas namque tendunt liquidæ fluendo: liquidas pellunt sese constringendo, resiliendo solidæ. In hisce mutuis & perennibus, sed alternatim factis partium morionibus posita est vita; sanitas in æquabili solidas inter & liquidas partes potentiâ, quâ sese mutuò & vicissim superant. Perpetuis illis, absolute tamen necessariis, partium nostrarum motibus semper aliquid effluit è liquidis, & è solidis abraditur. Ex indefinenti tum solidarum, cum liquidarum partium jacturâ nata est nutritionis necessitas. Duplicis illius substantiæ dissipationi refarciendæ, duplici materiâ providit natura, solidâ videlicet, nempe cibo; liquidâ, seu potu. Vis dissipatas corporis restituere partes? vis deficientes suffi-

cere & cibum elige ejus nutritiæ molecule facilius evolvantur, atterantur minutius, & ab excrementitiis felicius expellantur. Optatum scopum attinges, si cibum assumpseris, præscripseris multiplicem, probi ramen succi, consistentiæ, quantitatis, qualitatis, &c. congruentium.

#### IV.

**C**IBORUM concoctio in eorundem subactione, triturâ, & nutritiarum molecularum ab excrementitiis separatione consistit. Tritura inchoatur dentibus; fibris musculosis, morricibus, elasticis absolvitur. Subactionis duo sunt præcipua instrumenta, chymici menstrua, seu dissolventia vocant, potus nimirum & lymphæ. Potus infinitæ propemodum differentiæ, ex aquâ potissimum & fructuum succis oriundæ. Lympha coctioni inserviens multiplex numeratur, salivalis, gastrica, intestinalis, pancreatica. Non tam naturâ quam nomine & scaturigine distinguuntur. Omnibus ferè, tum lympharum, cum potuum speciebus inest ingens particularum magnitudine, figurâ, numero principiorum proportionem, &c. diversitas. Cum corporis nostri partes solidæ, liquidæ infinitis & infinitè propemodum inter se diversis constant moleculis, quo uberior erit in esculentis nutritiarum partium varietas, eo major erit eorundem ad nutriendum aptitudo. Quo verò major est multiplicitas ciborum, eo uberior est nutritiarum particularum differentia. Ideò enim cibi inter se sunt præcipuè diversi, quod nimirum integrantes eorum partes magnitudine & figurâ discrepant; quod principiorum integrantes partes constituentium proportio, textura, nexus, &c. sint diversa. Hinc aliæ sunt tenuiores, aliæ crassiores, aliæ angulosæ, aliæ rotundæ, aliæ ramosæ, &c. in his præpoller sulphur, in illis sal, in quibusdam phlegma, in aliis terra, quædam strictâ texturâ donantur, aliæ laxa, &c. ex tot variis variarum particularum concursibus infiniti propemodum magnitudine & figurâ diversi effinguntur pori. Hos omnes subire, non omnibus menstruorum moleculis datum est; sed aliis alios. Hinc si plures, si multiplices, si diversæ speciei cibi assumantur, eo copiosiores dissolventium particulæ vim suam exercebunt; nutritiæ ex assumptis cibis extrahuntur uberiores: è contra, si unicus, si simplex ingeratur cibis, multæ menstruorum partes supererunt otiosæ, inertes; multæ ingesti cibi moleculæ integræ, conjunctæ, excrementitiis permixtæ, inutiles, inconcoctæ remanebunt.

**C**HYLO ex tot multiplicibus moleculis confecto quæque corpori deficientes addentur particulæ, dissipatæ restituentur: singula corporis vigeant organa, functiones perficiantur; stabit vita; sanitas florebit. Ventriculus cibo multiplici recreatus gulæ errores faciliè feret: Lympha si quidem ex divite chylo deinceps oriunda quibuscumque ferè cibis subigendis erit aptissima; tanta namque erit partium suarum varietas, ut nullus ferè ingeratur cibus cujus subire meatus, ejusque partes dissolvere aliquæ non valeant; ipsarum lymphæ & potus molecularum in ciborum poros subingressum progressumque summoperè juvantibus musculosarum, elasticarum à tergo semper prementium fibrarum contractionibus. Antiqua igitur exulent præjudicia, sed cave ab incontinentiâ. Ideò bonas quas vocant fuge mensas gulæ destinatas proceribus, abdomini natis. Juvat quidem variis ac multiplicibus uti cibis, sed boni semper succi, consistentiæ, quantitatis, qualitatis, &c. convenientium: Imò juvat paulò deteriora edulia, suaviora tamen; melioribus quidem sed insuavioribus præferre. Misceantur itaque utilia dulcibus, assis elixa, conchilia turdis, &c. coctionem quippè cieant vel ipsi intermisti quandoque cibi durissimi: horum namque resistente duritie quæque aliorum ciborum particulæ ab invicem divelluntur facilius; divulsæ minuius conteruntur. Calculos seminibus permistos volucres deglutiunt, non quidem illorum magnitudine, figurâ, colore, &c. granorum, quibus vescuntur similibus delusæ; sed ut ipsorum, quasi tot minutarum molarum ope, exquisitiorem deglutitorum commolitionem promoveant incitatæ.

*Ergo cibus multiplex simplici salubrior.*

Proponebat Parisiis FRANCISCUS MERY, Parisinus,  
Baccalaureus Medicus. A. R. S. H. M. DCC. XXV.  
à sextâ ad meridiem.